

金文通公集

金文通公外集卷之六目錄

吳江金之俊豈凡著

雪竇石奇雲和尚塔院碑銘

無住菴碑銘

書刻金剛經跋

題放生彙紀後

跋獅山思益寺冊

文通公外集

卷之六

目錄

普德上人吟誦法華經千部題辭

蓮生社約

夕照寺收埋骸骨回向文

懺生願文

有小引

誕日禮懺願文

金文通公外集卷之六目錄終

金文通公外集卷之六

吳江金之俊豈凡著

雪竇石奇雲和尚塔院碑銘

皇清順治歲在辛丑春正雪竇石奇和尚示寂於婁東之南廣寺越五月歸葬於甬之妙高峰從其志也丙午春二月雪竇繼席弟子山夫行正以狀來請余銘其塔余與師雖不識面而師之行解雷耳久已隔峰

相見其何能辭。按狀師諱通雲號石奇。係出婁東徐氏。父諱調元。母孫氏。十歲失怙。寄養姊家。因篤疾間。陡現一境。如夢忽醒。曰前途灼然有條大路。何故留滯於此。乃辭母。告以出家之志。遂脫白于本州南廣寺。適往嘉定于護國寺壁間。睹中峰祖師偈云。蹭蹬莫隨愚伴侶。蹉跎又恐落風塵。悚焉猛省。矢願叅方。因母老未果。寄居隆福寺四年。旣而住靜虞山。刺血書華嚴經。遇等慈老夙。令看高峰語錄。提究父母未生前一着。服膺弗替。後往藤溪。聽講楞嚴。聞法師舉

千日學慧不如一日學佛。憬然曰：聽教非究竟也。旋往中峰。書完華嚴。至瓶窑。見聞谷師。復到顯聖。見湛然師。疑情大發。卒叅密雲老人。屢呈所見。密雲威叱曰：待你入處硬掙。後來爲人。手段自別。于是棒下頓脫凝滯。不離左右者一十三年。歲丁丑。於普潤院。掩關三載。一踞猊座。問難響答。機辯泉流。淮海人士翕然景從。辛巳。應密雲師命。住持台之。靈鷲來年。省密。密親手授師衣。未幾。密示寂。爾時得法諸弟子。競各布席一方。雲山渺隔。弗克躬襄後事。獨師一人肩之。

後赴景星之請。景星溪山奇勝甲子續城座下英靈。雲集氣吞諸方。刀耕火耨。不復作出山想。會癸未雪竇寺燬。乏主者。士紳延請再四。因策杖而至。山空無依。惟有堆雲敗葉。寺址半爲豪侵。如河南南陽之不可問。乃倚巘架屋而居。先時密師記曰。狗子無一隻。折筯無一雙。是汝住處。固在雪竇也。遂甘心居之。以偈勸衆曰。山居茆屋十餘間。驀地狂風盡打翻。珍重吾徒齊着力。大家扶起莫生煩。時諸山谷間。兵寇縱橫。兼之饑饉相仍。所在無寧宇。師恬不介意。懾暴以

慈伏強以忍久之。飯誠向化。皆爲外護。法堂方丈。厨庫。漏室。次第落成。二覺祖庭。崢嶸壯麗。頓復前規。師入山所云瓊樓玉殿。百草頭上。全彰千丈報身。瓦礫堆邊。頓現非虛語矣。越明年己丑。赴興化。黎君之請。遠近信嚮者。舟楫鱗比。老幼肩摩。諸方主席之盛罕出其右。菴址宅水中。邑人慮有水患。方議聚財編木爲衛。遂巡未舉。師以檀信供養所入罄付主僧鳩工竣事。俄而泗水忽至。竟免漂溺。師之力也。師珍重付授。絕不以佛法作人情。自是兩淮吳越數千里間。學



道高流聞風興感競推雪竇爲中流砥柱云。大抵師之門庭巖峻而存心廣大有過犯者改則許之。嘗云若使人根皆端不復用諸菩薩出現世間矣。歲丁酉婁東士紳有南廣之請。師因浚鹽鐵河直達于寺。以利舟行。其皈命之衆倡化之隆復不啻興化時也。初師矢志力扶法社。自是幾四十年。且將東歸妙高。未幾疾作。歷數日。命二侍舉時。皆以子時對。乃微點首。遂以是時逝。越數月。尚未合龕。顏色如生。瀕舉龕歸四明。忽寺西失火。僧寮俱燼。而龕獨巋然。人共異之。

乃於某月某日抵甬。定于妙高峰之塔院。溯其生于  
某年月日。卒於某年月日。世壽七十。僧臘四十有五。  
嗟乎。濟北宗風。自密師弘震之後。全提正令。而橫身  
坐斷。百尺無枝。孰有如石奇和尚者乎。其闡提法教。  
曰把關。曰靈鷲。曰景星。曰雪竇。曰興化。曰密印。六種  
集行世。其法侶之夙荷爐錘者。難以縷舉。其嗣法弟  
子一十二人。南廣行常。大梅行幟。雪竇行正。杖錫行  
旋。金沙行研。天王行林。妙高行恂。椒山行制。海岍行  
紹。登岱行建。南岳行環。西園行月。爲之銘曰。

承源臨濟。迦流楊岐。密老血胤。人天共推。入處硬掙。  
爲人自別。凜奉師言。提持直捷。乳峰生面。千載重開。  
明覺光明。爍破疑垓。靈鷲景星。施設蔚隆。末後涵藏。  
妙高一峰。大機大用。邈不可卽。雪瀑虹飛。今古爲式。

無任菴碑銘

余孩時便信因果恍惚若有所記弱冠皈依雲棲老人始知有生歿大事然爲舉子業所牽卒卒未窺其藩已而倖冠進賢遂浮沉宦海中貧迷領珠隨風飄墮自甲戌歲讀禮山居邁一時名宿言及太事因緣不覺悲淚與愧汗俱下因思小而一茶一飯大而爲出爲處總不容一毫放過古德云步步是汝證明處患不證明耳不患無其時無其地頭陀可不頭陀亦可蒲團可不蒲團亦可庚辰小草濫竽洪都兵署以

官舍爲方丈。以童叟爲大衆。以寮友士紳爲法侶。以  
奸蠹盜賊爲魔軍。不知烏紗之與毘盧有二相也。入  
世之與出世有二法也。一夕夢躡足高山。峰壑環秀。  
松濤沸耳。意甚樂之。忽有一介胄偉人。狀若金吾。自  
山巔趨而下。指謂余曰。此間係迦葉布席處。汝可好  
爲護持。正欲卽而詢之。頓失所在。遂大恚而醒。辛巳  
夏四月。循例鎮分寧。署枕鳳凰山。治兵之暇。偶閒遊  
來鳳菴。菴僧法壽。以隨喜祖塔請。拾級而上。行不數  
武。則唐朝無住禪師之塔在焉。徘徊瞻眺。山光林影。

宛符疇昔之夢。偉人所指。意在是乎。攷無任爲達摩之正傳。而迦葉之的派也。旁有凡塚纍纍。偏處祖穴。芟之不可。溷焉不忍。于是規塔左隙地。構一淨室。顏之曰無任。卽令菴僧法壽晨夕焚唄。其中以代予肩護持之擔。會工甫竣。余適有量移上谷之命。當不接漸而行。恐時方魔强。法弱。菴僧之弗克負荷。實滋余戾。因書此一段緣起。勒之貞珉。告後之秉節分寧者。願與余異地同心。結爲法侶。而于以整頓方丈。安隱大衆。掃除魔軍。于世法中爲柱石。卽于佛法中爲金。

湯俾丈草不茁于祖庭。野狐不嗥于鳳嶺。余或可藉  
是以不負偉人之囑付也已。嗣是以後。菴中常住。非  
雲水高流。身佩戒香者。不得入。倘酒肉薰心之徒。目  
之爲眼中釘。而有異志焉。則金剛寶杵。當碎爲微塵。  
勿徒作夢占也。爲之銘曰。

鳳凰之嶺。白雲蒼烟。有祖一燈。燭地光天。青松吼法。  
翠竹楊禪。應無所住。億劫勿遷。

書刻金剛經跋

善格云能以最上乘法授人使之因言省悟傳一人者當十善十人當百善傳大貴人大力量大豪傑者當千善蒐擇繕梓印卷施人者當萬善若佛說般若經六百卷中第五百七十卷之金剛經則最上乘法也今有一居士于此章句能生信心特捐貲繕梓誓願印施一藏勸人受持讀誦者鎮江蕭士淇法名性轉者也又有一居士聞此經典信心不逆爲之書寫者姑蘇彭蒼侯名璧者也此兩居士皆能以最上乘



法廣助流通其福德均之不可思量。正經文所云是人卽爲第一希有。又寧止萬善而已哉。息齋老人合掌讚歎而爲之跋。

題放生彙紀後

放生彙紀者。忘菴胡先生以仁人君子之用心。紹流水天台智覺雲棲之慧業。智果圓成于覺海。悲華燦爛于筆端。而有斯編也。小之爲吹羣倫之善氣。大之爲挽劫運之殺機。顯之爲標物我之同原。密之爲闡心性之了義。能使讀是編者。一展卷而生趣。填胸慈因。滿目處處作含靈。怙恃人人肩佛法金湯。以之世出世間。必回刀兵爲衽席。必化鼎鑊爲蓮池。有是夫仁人之言。其利溥哉。然則有斯編而古今來儒碩禪

宿所著放生戒殺種種名言與義總彙于是矣余因  
反覆是編始信佛說三界惟心凡法界海會蓮華藏  
中無邊佛刹微妙莊嚴盡在大心菩薩一念中現初  
放生池經始時一望荒丘並無片瓦寸椽微機上人  
僅營一團瓢孑然孤處于寒風苦霧中曾幾何時而  
紺殿巍巍翼以東西兩禪堂並準提堂瑋麗悉稱是  
且緣放生推之憫死又于池東寂照寺偕柴道人收  
埋人畜骸骨經畫備極周詳行將莊嚴一地藏殿永  
度冥魂如此無量功德咸自忘菴先生一念大心中

湧出。豈世之布金希福者比也。余故特爲拈出。以爲  
讀斯編者告。

文通公外集

卷之六

題放生彙

九

跋獅山思益寺冊

余歸田八年于茲。偃息之暇。每杖策大小梵剎。訪尋  
道伴。一洗塵襟。獨獅山離城咫尺。曾未措足。戊申夏  
偶登虎丘萃勝閣。向東南遙睇。峰勢崢嶸。酷肖獅形。  
聞有寺名思益。雲棲的裔靈白法師。現駐錫其中。一  
日偕嚴令武伯仲。過而訪之。清幽孤寂。人踪罕至。非  
真心辦道。泊然于名聞利養者。未肯謝塵囂而枯坐。  
此獅窟中也。因攜一冊示余。具載茲寺成毀顛末。併  
近來興復緣起。余爲展卷嗟歎者久之。一則景靈師

之行解相應。遠接唐開元間勝光法席。一則重王氏  
之父子昆季。彷彿王摩詰之捨輞川爲選佛場。洵吳  
中一時勝緣。千載佳話也。余故喜而爲之識云。

普德上人奉誦法華經千部題辭

蓮華經曷爲以妙法稱也。蓋佛所成就第一希有難解之法。名爲一大乘。又名無量義。一切聲聞辟支佛所不能知。惟佛與佛。乃能究盡諸法實相。分別解說。接衆生于火宅。等與大車。誘小乘以化城。勿住二地。眞炳幽宵之大法炬。杭苦海之大法船。濟徒涉之大法橋。垂廣蔭之大法樹。故獨以妙法名斯經也。經中說偈云。若持八萬四千法藏十二部經。爲人演說。亦未爲難。于我滅後。聽受此經。問其義趣。是則爲難。茲

佛恩與

永定門佑聖菴普德上人特發弘誓願爲其難者持  
誦法華經一千部。自今春始以三載圓成。務求深解  
此經義趣。不負多寶塔中獅子座上三摩付囑。將

君恩並報。自利與利他兼資。豈尋常圓頂方袍以喃喃  
課誦消十方信施者可同年而語哉。攷晉義熙間。曇  
翼法師入秦望山誦法華經。越二十年。有女子身披  
彩服。攜筠籠盛以白豕。兩根大蒜。至師前。曰妾入山  
採薇。日已夕矣。豺狼當道。歸無生理。敢托一宿。師却



之甚堅。女哀鳴不已。遂以草床居之。夜半號呼腹痛。告師按摩。師以布裹錫杖。遙爲按之。翌日女以彩服化祥雲。豕化白象。蒜化雙蓮。凌雲而上。謂師曰。我普賢菩薩也。特來相試。觀汝心如水中月。不可染污。旣而天雨寶花。地皆震動。時會稽太守孟凱。方晨起視事。忽見南方祥雲。光射庭際。隱然絲竹金石之音。訪知普賢示化。以師道行聞于朝。勅建法華寺。今日繼響。曼翼大師得法華三昧。而感應普賢。再觀雨花殊勝。因緣者。余于普德上人。且翹首俟已。因爲之說偈。

日。

稽首釋迦文。以一大事故。出現于世間。  
開權而顯實。中有無量義。諸佛乃能知。  
火宅不可居。化城亦難息。種種譬喻辭。  
演說唯一事。止此一事實。餘二卽非真。  
八萬四千藏。獨稱妙法幢。受持能信解。  
功德最無邊。曇翼大法師。親蒙普賢現。  
感應今古同。普德亦如是。

蓮生社約

世俗狃于賀生之說。每至誕辰。爭侈宴會。廣戕物命。因己之生。致彼之死。生者祈齡祝算。讌笑華堂。歿者剝腹抽腸。含悲沸鼎。愚癡背理。莫此爲尤。顛倒成風。習焉弗察。願求仁人長者。體萬類之同情。并告順子慈孫。思母難之應。度擬結蓮生之社。共植慈因。凡遇誕降之期。咸修淨業。或誦經。或禮懺。各量力以圓成。或齋僧。或放生。務隨緣而喜捨。勿以駒隙螢光。作如川如日之妄想。惟藉祖燈佛炬。示上品上生之南車。

凡我同心弗論縉俗。倘肯欣然入社。乞書諱號年庚。

夕照寺收埋骸骨回向文

大德垂慈。度盡衆生。爲本願。能仁顯用。來臨法會。以施權。惟茲老穉。遺骸丁年剩骨。暨夫含情異類。碎骨殘齒。皆因無量劫來。迷自本性。以致飄零六道。墜溺三途。劇苦殊殃。難可具說。弟子某等。痛念浮生之易逝。倘淪波趣。以何堪。敬邀三寶慈力。冀拯一切羣靈。所有某月分收過人畜骸骨。共計若干。今于某月某日。理合回向。特延淨德幾衆。誦某經幾部。禮某懺幾部。法師某人。虔修瑜伽教儀。施放焰口一壇。藉真言。

之密諦。仗妙觀之圓通。灑法味于大千。咸承甘露。登  
有情于十地。悉證菩提。仰願慈悲。俯憐攝受。謹疏。

懺生願文

有小引

生曷爲乎懺也。懺生之有罪也。生曷爲有罪也。  
無罪則無有生也。生緣罪來。罪因生集。生死循環。  
罪墮無間。世人但知賀生。不知懺生。生可賀也。  
罪可賀乎。爰作懺生願文。告之同志。

伏念流光易逝。龍驤莫追。大事難明。億劫未了。日去  
一日。增卽減因。年短一年。樂是苦果。凡夫迷謬。妄冀  
長齡。每遇誕期。爭相祝慶。親朋蟻聚。讌笑華堂。物命  
駢羅。啣悲沸鼎。因生而致殺。顛倒成風。造業以祈年。

愚癡無比。其欣聞佛法。痛世無常。九如諛耳。可愧可  
慚。入苦嬰心。可悲可涕。值茲受生之誕。敢忘母難之  
辰。敬集高流。虔修淨業。放諸生命。消冤對于抱識。含  
靈宣佛洪名。懺罪障于今生。夙世從茲以往。誓結蓮  
胎。願彼衆生。咸離苦海。



誕日禮懺願文

伏念流光易逝。雲驥莫追。大限猝逢。業山誰懺。與其待一口氣不來。令兒孫乞憐于冥府。何如趁兩足猶在地。仗已躬稽顙于

佛前。茲值誕辰。亟應懺悔。懺從前所有夙業。一懺永不復留。悔向後所有新愆。一悔再不相續。敬以受生之日。爰整渡死之航。誓結蓮胎。力超苦海。仰願慈悲攝受。曷勝痛切翹勤。

金文通公外集卷之六終

金文通公外集卷之七目錄

吳江金之俊豈凡著

愚絕大師禪淨一燭頌

靈隱知浴寧一禪師頌

和明巖大師念佛十頌

附跋

和洞山初禪師十心頌

和普明禪師牧牛圖頌

原韻

四相頌

和聞谷師走馬燈偈

原韻

贈得實上人偈

贈暎天上人偈

贈鶴松上人偈

贈得心上人偈

贈雪嶼上人偈

贈鏡清上人偈

贈紺目上人偈

贈本明上人偈

贈聞普上人偈

贈彼旃禪師偈

贈夢有上人偈

贈徹機上人偈

和端禪師十空偈

贈惺生上人偈

贈智生上人偈

贈寂空法師偈

贈慧恒上人偈

贈本愚上人偈

贈持菴偈

贈行仁偈

贈行邇偈

贈天慧上人偈

贈雨一上人偈

贈月門上人偈

贈心源上人偈

上人專修淨土

贈以靖上人偈

贈正句上人偈

贈冰心上人偈

贈悟明上人偈

時悟明正禮楞嚴

贈晦谷上人偈

贈笠峰上人偈

笠峰病跛時發願閱藏

贈比丘尼行馨偈

奉祝石公和尚七袞大慶偈

夢參天童偈

醫王偈

醫偈

醉偈

我相偈

迷家偈

到家偈

月偈

四首 附跋

證研禪師像讚

守愚禪師像讚



天印禪師像讚

虛菴和尚像讚

德宗和尚讚

蓮大師放生讚

金文通公外集卷之七目錄終

文通公外集

卷之七

目錄

日

金文通公外集卷之七

吳江金之俊豈凡著

愚絕大師禪淨一燭頌

稽首迦文惟我獨尊不立禪名亦泯淨相只一事實  
餘二非真妄生分別固墮魔外着意融通本分尤乖  
長夜漫漫靡由而旦一盲衆盲牽衣落墊惟愚絕師  
剗盡諸訛獨指本原佛亦不似大哉一燭圓照無方

是禪是淨相逢故鄉

靈隱知浴寧一禪師頌

衆生本淨。浴箇什麼。既無可浴。知箇什麼。浴無所浴。知不用知。是名知浴。靈隱高足。

和明巖大師念佛十頌

未念

營營終日算無餘。夢裏尋緣萬事虛。枉把浮光駒影送。何曾繫念有須臾。

初念

乍提六字未精專。妄想紛飛霄漢懸。手口與心三作合。就中杆格詎能蠲。

攝念

志嚮彌陀雜未精。須將萬慮一澄清。心猿意馬牢拴

任字字從今要認明

切念

念聲不斷尚嫌疎。二六時中如護珠。生死關頭須看破。猛超劫海奮程途。

純念

密密綿綿無去來。虹飛電閃不聞雷。只知繩貫惟心訣。不管西方有寶臺。

任念

念熟猶如順水舟。濤翻浪湧亦安流。何曾着意施篙。

槽任到中央快自由

悟念

從此了知念佛誰佛無定向念安之迷雲豁盡青天  
現方是本來全露時

寂念

念歸無念始超方山自高今水自長十世古今無起  
滅大千沙界盡承當

忘念

都除能所與斷常大地陽春遍界彰擲却數珠閒着

口太虛雲過笑他忙

圓念

東土西方總一家。何分彼岸與此涯。登峰造極原平地。自性蓮臺自湧花。

附跋

雪道人德濟撰

明巖大師念佛十題。竊比牧牛十題。尤難頌也。夫牧牛尚有人境形容。念佛只貴一心不亂。可不難乎。其未念至初念二頌。人皆可以效顰。其攝念至

圓念八頌。非到家人不能頌也。今閱息翁十頌。妙在無階級中。權立階級。前後次第。不犯不及太過之病。最妙念歸無念。能所都除。斷常俱泯。到此欲覓念佛者。了不可得。何處更有苦樂染淨之境哉。夫蓮宗之旨。古今闡析已備。然未見有此十頌。如是精妙而徹悟圓融者也。善哉。息翁真到家人也。我聞教中有大菩薩。或現宰官身說法者。誠哉是言。可不信乎。



和洞山初禪師十心頌

心是春一鼓陽和萬象新。資生資始乾坤德。要除三毒最先嗔。

其二

心是水濁惡紛投。寧受滓。或欲障之往西流。須臾障盡東還駛。

其三

心是火焦天灼地。三塗果。惟有寒冰佛祖門。淨消煙燄蓮生朶。

其四

心是秤。鉢黍釐毫皆有定。那移輕重錯盤星。暗室鬼神來作證。

其五

心是尺。短長寬窄難損益。毫髮稍欺亂準繩。沉淪萬劫堪痛惜。

其六

心是斗。十升百合誰其咎。休教淺滿任情欹。積孽高山空自受。

其七

心是燈。燭暗指迷代。月恒只怕狂風來。陡滅茫茫前  
路踏春冰。

其八

心是鏡。具足光明是本性。畧惹塵埃着力磨。須教垢  
盡恒沙映。

其九

心是道。驀直前行本浩浩。忽長荆榛塞路旁。出門是  
草幾時到。

其十

心。是。師。折。攝。狂。徒。時。刻。隨。忘。懷。着。意。非。善。教。凝。然。不。  
動。號。尊。師。

和普明禪師牧牛圖頌

原韻

未牧

狂心正熾任咆哮。觸步荆榛路轉遙。仇殺山童來管束。幾時回首憶根苗。

初調

鼻孔生來須用穿。從今切莫恕伊鞭。無端劣性千鈞重。好把芒繩儘力牽。

受制

漸加降伏懶奔馳。嚙水吞芻逐步隨。只恐狂風來谷

口芒繩緊捏敢言疲。

回首

牽拴日久忽回頭。毛色漸移性亦柔。要識還家途不遠。綠楊堤畔且遲留。

馴伏

水碧雲濃古澗邊。相隨到此意悠然。斜陽欲動歸來好。撒手回看不用牽。

無碍

經年調御漸如如。着地安眠永不拘。放下鞭繩無一

事數聲羌笛月明餘

任運

信步踏來芳草中。不饑不渴綠陰茸。山童枉費閒心力。羸得藤蘿一枕濃。

相忘

人牛相看白雲中。爾旣無求我亦同。擬議于今都斷絕。悠悠江水自流東。

獨照

原來剩得一身閒。雙手拍開到此間。了却萬緣無半

點悄然已透末重關

雙泯

人牛非有那尋踪皓月澄秋萬里空  
若問個中消息也虛亭綠滿草叢叢



四相頌

生

生。老。病。死。如。轉。軸。只。因。有。生。萬。苦。續。世。人。顛。倒。盡。貪。  
生。墮。地。嬰。孩。偏。解。哭。

又

十。方。圓。應。如。輪。軸。有。生。無。生。靡。斷。續。識。得。娘。胎。面。目。  
真。拍。手。高。歌。當。痛。哭。

老

髮。變。齒。搖。景。漸。衰。拔。山。氣。力。也。難。支。亦。曾。笑。殺。龍。鍾。

漢。今。日。龍。鍾。却。是。誰。

又

七。步。周。行。無。盛。衰。天。上。天。下。我。獨。支。剎。那。送。盡。乾。坤。  
老。孩。亦。依。然。是。阿。誰。

病

四。大。本。非。堅。固。因。五。衰。到。此。苦。相。尋。岐。黃。百。草。空。嘗。  
遍。療。得。闔。浮。幾。個。人。

又

四。百。四。病。本。無。因。醫。王。空。費。老。婆。心。方。便。多。門。賣。假。

藥原來哄盡自家人

死

一氣不來兩眼閉。那分王侯與徒隸。無情閻老鐵肝腸。要把枯骸細算計。

又

因緣到時開眼閉。一切銷殞無餘地。來本無所去。何從觸體堆裏饒活計。

和聞谷師走馬燈偈

原韻

爭向熱處挨身任人眼青眼白如駒過隙光陰一味  
奔馳不輟個個英雄好漢迷却到頭時節直待燈燼  
光寒管教一齊休歇嘆是則是只怕到底跳不出這  
圈子打破假合因緣方是動靜俱徹

又

鬧嚷嚷驅前擁後煖烘烘星馳電走光燄燄輝筵洞  
牖急波波時已戌酉咄看你到黑漫漫時節還有個  
主張兒行動一步否

交通公外集

卷之二

和馬盛倡

十一

了義覺斯先生評

贈得實上人偈

一切世間無一非幻。六根四大和合成幻。幻起幻滅。同歸幻化。肉身法身。總名爲幻。有覺無覺。均未離幻。幻翳朗然。非幻不滅。不滅現前。是爲得實。

贈暎天上人偈

一切衆生。無明染病。顛倒昏迷。淪喪慧命。般若菩提。皆人自性。自性光明。虛空同淨。回光返照。如日如鏡。是名暎天。雙融邪正。

贈鶴松上人偈

雲間鶴聳翮。青霄脫鼎鑊。嶺上松盤根。碧澗傲虬龍。  
世上孤高唯二物。有能兼之堪學佛。鶴巢松頂月明。  
中山河大地琉璃同。

贈得心上人偈

諸佛衆生唯是一心心不生滅。寥廓無垠六度萬行。  
燦然具陳。着相取境。背覺合塵。如來當體。歷劫難親。  
欲求成佛。認取本真。無法可得。是名得心。

贈雪嶼上人偈

雪裏看山山更好。只因清淨無塵惱。寒光一片滿大。

千獨坐茆菴聞道早。

千巖萬壑水晶中。徹底根塵淨洗空。此意誰人能理會。思惟坐斷接鴻濛。

贈鏡清上人偈

心如明鏡秀也拈着。本來無物慧更開擴。垢或翳明。明體不削。千形萬象到來畢灼。含光在內體莫可摸。日爲赤輪。月有皓魄。惟鏡兼之。鏡清弗涸。

贈紺目上人偈

碧眼胡僧。翻天倒地。橫說豎說。都無實義。見性明了。



單刀直刺。以心傳心。大圓鏡智。只有一實。更無餘二。性見覺明。周徧不匱。是名紺目。如來授記。

贈本明上人偈

諸漏根本。無明爲因。緣有無明。三毒纏身。流浪生歿。永失性真。無明若滅。三界都泯。一切罪障。蕩滌無垠。欲滅無明。不費苦辛。以本明故。直下超塵。

贈聞普上人偈

諸佛經典。我聞而傳。非關耳聽。聞性則圓。解甚深義。垂劫萬千。耳根功德。千二百焉。入三摩地。聞思居先。

破多聞。惑圓通。乃全是名聞。普紹如來禪。

贈彼岸禪師偈

生於海中。曠劫瀾漫。五葉花開。一刀截斷。說謊瞞天。  
坑殺好漢。理會得來。陽春冰泮。千七百則是案。非案。  
提唱者誰。高山彼岸。

贈夢有上人偈

三界萬有。悠悠一夢。迷人執着。認有打開。顛倒攀緣。  
淪溺可痛。智者疏觀。如夢不動。大夢大覺。太虛空洞。  
是名夢有。祖庭樑棟。

贈徹機上人偈

徹機徹機。如何是機。如何方徹。若云古今尊宿。拈着  
拄杖。是機。豎起拂子。是機。則放下拄杖。收了拂子時。  
機向何處設施。若云伶俐衲僧。知道拄杖落處。是徹。  
會得拂子點處。是徹。則拄杖未曾落。拂子未曾點處。  
徹作麼生證取。今日大周特地與汝道破。息機機存。  
大徹無徹。拄杖拂子。都用不着。放生池內水。汪汪無。  
量。衆生歸極樂。是之謂徹機。

和端禪師十空偈

人生枉打算。萬事水流東。田園和第宅。辭世一場空。

其二

多少英豪輩。浮名腐草同。韓彭與班馬。到頭一場空。

其三

丈夫爭意氣。我見最難融。四大崩離日。好勝一場空。

其四

兒孫初養育。愛護勝己躬。限到莫能替。好醜一場空。

其五

妻妾恩愛種。寢穴誓相同。生離或死別。緣盡一場空。

其六

根塵本假合。遂爲業垢叢。果報絲毫應。懊悔一場空。

其七

妄想生煩惱。火宅添薪同。回頭不及早。焦爛一場空。

其八

人身最難得。大地瓜土同。懶惰不學道。受生一場空。

其九

罪福總無相。執着如捕風。不達無相義。修習一場空。

其十

宗教門庭別。流歸大海同。自性不明了。施設一場空。

贈惺生上人偈

一切有情因迷受生。循環往復因生轉。迷念彼迷人。  
本惺惺者不緣生生。不緣生滅無明障覆。如月遭蝕。  
障盡明現。常寂常惺。是名惺生。直證無生。

贈智生上人偈

有世間智。有出世智。世智螢光。性智日月。生不離智。  
智爲生汨。無量煩惱。能障智故。住智慧山。斷煩惱種。  
世出世間光明徧照。是名智生。四依中一。

贈寂空法師偈

心量廣大。猶如虛空。虛空不壞。億劫靡窮。情生智擾。  
真空乃蒙。在喧能寂。空涵性中。不着空見。是名寂空。  
雨大法雨。震旦之東。

贈慧恒上人偈

黃梅教人。自看智慧。一切衆生。具般若故。愚癡煩惱。  
障蔽慧根。如雲覆日。如夜失炬。認取自心。雲開夜旦。  
放大光明。恒沙照徧。是名慧恒。無明永斷。

贈本愚上人偈

多知多解。學人通病。返朴還真。認取自性。墻壁無殊。  
纔有把柄。昭昭靈靈。尚非究竟。無心三昧。光明四應。  
是謂本愚。續佛慧命。

贈持菴偈

佛號能持。經貴受持。或名持誦。或名持念。行住坐卧。  
繩貫珠聯。斷常能所。雪消冰泮。自最初發心。至究竟。  
堅固一持。盡之。是名持菴。

贈行仁偈

諸佛菩薩。以慈爲本。慈無不至。號曰能仁。仁遠乎哉。



汝心卽是一念回光。佛菩薩等是名行仁憐憫一切。

贈行邇偈

教外別傳秘密不越日用現前。離却喫飯穿衣。那討明心見性。咄。欲踞妙高峰。行遠必自邇。是名行邇。毋忘授記。

贈天慧上人偈

世尊有言。奇哉衆生。具有如來智慧德相。此般若體。降生自天。無脩而脩。絕證而證。剗盡知解。掀翻白窠。孤露圓明。燭天鏡地。是名天慧。嗣如來禪。

贈雨一上人偈

釋迦四十九年來。未有一字曾說着。惹得西來雨。一  
花雷轟電掣。都成謔。

贈月門上人偈

西來直指還成曲。屈殺兒孫叫覆盆。棒喝元來無箇  
事。紙窓生白月當門。

贈心源上人偈

上人專修淨土

心是本源清淨佛。凡情聖境咸除訖。有人識得心源  
者。始信本來無一物。

一自雲棲示寂後。唯心淨土誰能透。卽心卽佛肯無疑。便是大梅梅熟候。

贈以靖上人偈

森羅萬象。虛空景繁。聲雜色何。須屏六根。不動只疑然。無用干戈國。以靖。

贈正句上人偈

三藏十二部。一千七百則。如何是有句。如何是無句。如何是有句中無句。如何是無句中有句。信口判得來。此之謂正句。

贈冰心上人偈

煩惱薪無明火。晝夜熾然。紅爐安坐。臘月三十。何處  
避驪止沸揚湯。到頭計左。西來直指。恁狼籍爲拔衆。  
生出火宅。爭如無法。可指乎一片冰心。在玉壺。

贈悟明上人偈

時悟明正禮楞嚴

妙覺明性。妙明元心。人人具足。箇箇圓成。祇爭有迷。  
有悟。無分明與不明。一朝桶底脫落。滿天星斗全呈。  
是謂悟明。長老認取面目。孃生。

贈晦谷上人偈

馬師具大機大用。守鈍于磨磚。香巖能答十答百。甘心乎學圃。學道之士。有能韜光如晦。涵虛若谷。殆得祖意者矣。偈以頌之。日光含萬象。寧辭晦響應千聲。唯有谷只今。何處覓伊人。淨土慈津隱晦谷。

贈笠峰上人偈

笠峰病跛時發願閤藏

天門地表形如笠。道人荷之偏相習。休嗟一步未能行。直向孤峰頂上立。教外別傳具教中。欲把大藏一口吸。是之謂笠峰禪師佛意祖意全透入。

贈比丘尼行馨偈

自性法身具五分香。回光返照。殊妙香幢。普薰三界。  
彌布十方。愛河慾海。頓成康莊。羶情穢識。盡吐芬芳。  
不越五漏。五香涵藏。是名行馨。清淨難量。

奉祝石公和尚七袞大慶偈

稽首古彌陀。乘願來震旦。將相所不能。俗緣一刀斷。  
雲棲嫡血嗣。過量真好漢。平實顯門庭。宗教唯一貫。  
棒喝不輕施。望之絕畔岸。古希世人有。吾師難名贊。  
須彌作壽山。虛空同不換。

夢叅天童偈

海浩瀚兮嶽嵒嵒。宗風赤幟號天童。雷音震地起蟄蟲。  
慧炬中天豁瞽矇。數載翹勤恨未逢。夢中授記如親蒙。  
當機半句逗針鋒。明明歷歷主人翁。主人翁醒來依舊了。  
無蹤咄。夢者醒者誰別同。稽首四明大圓宗。

醫王偈

世傳岐與黃。能嘗百藥草。療生不療死。治病難治老。  
惟佛爲醫王。真懷濟世寶。不鍊長生丹。但證無生道。  
世人若肯依。方行生老病死一齊掃。

醫偈

四。百。四。病。皆。可。醫。惟。有。實。病。最。難。治。見。色。聞。聲。總。受。  
傷。纔。生。一。念。成。驚。悸。非。關。內。稟。厚。薄。殊。亦。非。外。感。重。  
輕。異。大。地。山。河。悉。病。根。偏。是。家。親。尤。作。祟。須。逢。起。死。  
大。醫。王。空。諸。所。有。真。良。劑。

醉偈

世。間。多。醉。漢。非。關。飲。酒。故。醉。利。復。醉。名。醉。色。尤。堪。怖。  
沾。着。使。昏。迷。殺。身。亦。不。顧。一。世。無。醒。時。永。劫。尚。未。寤。  
欲。求。解。醉。方。須。是。盡。情。吐。



我相偈

衆生溺生死。一我爲之根。我相如堅城。勁兵弗能摧。  
我相如怒潮。烈風不肯迴。惟有過量英靈漢。摧破堅  
城潮退走。廓然無我包虛空。截斷死生真好手。

迷家偈

錯認他鄉是我家。一生飄泊在天涯。經營費盡空勞  
碌。登登雲山路轉遐。

祖傳家業廣無邊。包裹虛空恁周圓。窮子只因貪火  
宅。千生百劫未曾還。

到家偈

滿。目。兒。孫。皆。旅。寓。故。園。望。斷。好。傷。懷。有。人。指。點。還。家。路。驀。直。前。行。更。莫。猜。

家。中。端。坐。主。人。翁。若。不。到。家。何。日。逢。火。速。回。頭。拋。客。舍。關。河。阻。隔。剎。那。通。

月偈 四首

一。天。如。鏡。涵。羣。象。照。破。恒。沙。萬。影。迷。任。是。浮。雲。時。聚。散。光。華。到。處。逗。真。機。

本。來。明。妙。義。難。宣。磨。盡。古。今。只。自。然。晦。朔。盈。虧。俱。幻。

影。一。真。恒。朗。泯。偏。全。

輝。天。燭。地。體。無。方。從。古。迄。今。不。覆。藏。恨。殺。指。頭。多。註。  
腳。兒。孫。賺。盡。好。悽。惶。

一。片。圓。明。照。大。千。徧。地。生。盲。亦。了。然。可。惜。雙。眸。炯。炯。  
者。無。端。着。屑。昧。光。天。

附跋

雪道人德濟撰

余讀息翁月偈。句中無月。月滿句中。可見心本是  
月。未悟心者。焉能洞曉月義。月不離心。未見月者。

又焉能還證心體。嗟彼世人。但見月影。未見真月。蓋真月者。原非凡夫肉眼見之。直須過量大人。頂門具眼。方許見此真月也。妙哉月偈。句句直指人心。字字發明真月。究竟覓心心不可得。指月月不可見。直饒心月兩無踪。纔是光明輝八極。後有閱者。幸勿作尋常偈語會。苟或不然。非惟不悟自心。亦不能見此真月。豈不當面錯過。辜負息翁不少乎。

證研禪師像讚

古栢蒼蒼。澗水汪汪。亘古及今。從無覆藏。佛祖到此。  
斷絕商量。惟我證研。出世舉揚。不棒不喝。萬法齊彰。  
掩關嘿坐。學者望洋。

守愚禪師像讚

手不捻數珠。而禪淨融。口不談因果。而夙命通。以一  
貝葉載三藏。十二部。而不滿毫端。以一爐香薰三千  
大千界。而不滲毫端。我儀圖之。大智若愚。伊何高流。  
吉祥守愚。

天印禪師像讚

壽昌嫡嗣。石公授記。疾燄過風。麗土圓機。奔流度刃。  
捷辯馬師。權說實說。熾然廣說。橫說豎說。一字不說。  
卽教卽宗。佛祖同風。無淨無禪。明星以前。向也佛日。  
重暉。今也鐵佛巍巍。

虛菴和尚像讚

亦有田園。亦有家室。火坑愛河。猛躍而出。非教非禪。  
一味老實。爲農爲工。勤苦無匹。這是阿誰。是個古佛。

德宗和尚讚

不披袈裟。冬夏一褐。不動拄杖。魔軍氣奪。津梁智愚。  
如救饑渴。悲憫幽顯。出手殺活。是法非法。一筆塗抹。  
本地風光。山高水濶。師乎師乎。西方真鉢。

蓮大師放生讚

云何有生。卽殺者是。云何有殺。卽生者是不生。不殺。

不殺。不生生。殺相。循刈草。復茁慈悲。導師權宜說法。  
未論無生。且勸莫殺。殺機全泯。生種斯拔。生既無有。  
放亦何著。若云放生一棒打殺。

金文通公外集卷之七終



金文通公外集卷之八目錄

吳江金之俊豈凡著

祖鵝湖大師一衲遮身原韻

有引

病起彷彿白樂天自誨

自味

答客問

解客難

二可歎

蠶歎

息齋四勸

戒八無益

十無益

拈古

金文通公外集卷之八目錄終

金文通公外集卷之八

吳江金之俊豈凡著

祖鵝湖大師一衲遮身原韻

有引

余讀鵝湖養菴禪師集有一衲遮身十偈不覺  
三復喟然人生世間屋廬以遮風雨而有時化  
爲丘墟田園以遮饑寒而有時迭遭水旱名位  
以遮門第而有時功成身退文章以遮固陋而

有時悲滅不傳。甚而修鍊天仙。以遮生老病歿。  
而有時報盡劫至。還墮輪迴。然則三界之內。欲  
求一安隱遮身之處。畢竟不可得也。有味哉。鵝  
湖之一衲乎。因爲之和。

一衲遮身百事荒。垣頽壁破總無妨。殘燈照遍恒沙  
國。半榻津梁極樂邦。定裏渾忘苔色老。峰頭祇見白  
雲忙。謀身莫訝山僧拙。畏踐人間六月霜。

一衲遮身百事新。掀翻窠窟穩藏身。大千世界全無  
碍。百尺竿頭斷却嗔。生滅滅生呈幻影。色空空色逗

元神了知賢聖無爲法。雕雪鏤冰總是真。

一衲遮身百事閑。柴門竹徑自盤桓。虎溪到處雲隨步。龍藏宣時石聽談。坐斷十方成大歇。無邊苦海任狂瀾。香臺夜半烟消後。月影移來補衲殘。

一衲遮身百事浮。止餘領寶莫輕投。歲時花落幾番後。世上人生半白頭。大地山河終殞滅。語言文字總難留。金剛四偈君知否。那得歡娛那得愁。

一衲遮身百事休。閑揮塵尾逐雲遊。十纏五惑從今斷。一鉢三衣不用謀。佛法原無如是任。衆生非有爲。

誰愁但看數點斜陽動。莫向桃林再放牛。

一衲遮身百事無。眠雲掃雪伴樵夫。收來塵刹供彈指。捲却河山入畫圖。戲論亡時除外道。狂心歇處見毘盧。虛空瞥地成消殞。半點浮漚在五湖。

一衲遮身百事飄。三登九上也逍遙。愁城破盡江天濶。愛水乾時日月高。費得草鞋錢幾個。安然拄錫躡層霄。寄言利鎖名韁客。莫把工夫浪裏陶。

一衲遮身百事勾。全拋大海更無憂。黃金布地誰能拾。白骨成陵賊不偷。剗盡新秧和舊業。祇餘孤磬入

樵謳返觀不壞真如體一切有爲露電浮

一衲遮身百事完。藤牀穩坐信幽閑。超諸有漏修非  
易。悟得無生證豈難。鳥語喧林當夜靜。溪流涌石到  
江闌。菩提圓滿歸無得。惟有山花獻古巖。

一衲遮身百事忘。蒲團月滿好回光。根塵和合從他  
熱。能所雙除獨自涼。彼听到來知筏喻。主人無夢見  
珠囊。休將禪敎生分別。華藏蓮胎一樣香。

病起彷彿白樂天自誨

古來七十稀。余年四十六。七十或可期。來日已苦速。  
二十四年間。光陰如轉軸。追前以思後。世事槩可燭。  
生計本來疎。宦情終未熟。富貴總逼人。享受良跼促。  
而况草上霜。修短杳難卜。只今一病餘。未老同枯木。  
到此不回頭。真可深痛哭。第宅寧吾廬。逆旅僅一宿。  
眷屬豈久依。棲鳥偶相簇。徒隸與王侯。到頭皆枯蠹。  
嗜癯固豢豕。嗟窮亦癡鹿。身世兩俱空。胡爲自結束。  
刈愁如刈草。毋使斷還續。破妄猶破闇。須將慧炬矚。



不。食。吾。不。甘。但。辦。饑。時。粥。重。裘。非。所。願。擁。爐。亦。自。煥。  
不。餒。又。不。寒。蕩。然。無。可。欲。嘿。坐。向。空。王。夢。境。忽。有。觸。  
夢。醒。還。防。夢。努。力。幸。自。勗。繇。來。聞。道。難。得。少。勿。遽。足。

自咏

非關賦骨貧。墨肥吾所耻。行藏式漁樵。性情諧鹿豕。  
嘯歌林月間。卧起花園裏。萬事付飄風。一杯見真旨。

其二

北門任彼嗟。南軒我自適。風來花氣酣。雨過苔痕碧。  
對客半逢僧。讀書惟手易。寸心天地寬。寧爲饑寒窄。

其三

秋來虛室裏。宛在深山中。溫飽非吾計。死生亦幻空。  
數聲蕉葉雨。幾陣紙窓風。中有無窮意。誰余領畧同。

其四 效樂天咏慵體

我貌慵不澤。我心慵不役。權勢慵不趨。寧開貴人隙。  
錢財慵不求。寧受室人謫。惟有頭上髮。未許慵不白。

其五

亦祿二千石。而甌無貯粟。亦位監司長。而性能忍辱。  
非無計謀生。非有心矯俗。但看草頭霜。儵然意已足。

## 答客問

有客問余曰。汝久矣。佞佛逃禪。莫非信有因果乎。余曰。信。豈有因果而無也。又一客問余曰。我從來不信因果。汝何所見而信。余曰。不信。亦是原未嘗有因果也。二客避席起曰。汝何說有因果。又說無因果。自相矛盾至此也。余曰。否。說有因果。則真有說無因果。則真無。余言皆是也。二客訝甚。還詰余曰。然則天堂地獄。畢竟是有。是無。余曰。有天堂。有地獄。亦無天堂。亦無地獄。二客轉訝甚。曰。是給吾輩也。皈依三寶者。恐

不宜信口妄語也。余曰：否，非妄語也。子若沉酣經笥，  
淹貫宗庫，不依經解義，又不離經一字，不守枯椿，死  
又不沉豁達空，一踏直踏毘盧頂，顙上行，一踢踢翻  
千七百老窠，皆纔信我言，非妄語耳。客嘿而退。

# 解客難

客有難大周者曰。汝謂極富極貴者人也。極貧極賤者亦人也。果爾。則保得富貴。免不得貧賤。又何羨此富貴爲哉。大周曰。唯唯否否。要免貧賤。須從保有富貴中來。若趁此一生富貴。痛自猛省。免得千生百劫之貧賤。則其爲極富極貴也。更非止俯仰耳目間。可以罄其形容讚美者矣。倘一失此富貴。則必換却皮囊。變却枯體。卽欲長守貧賤而不可得。哀哉。興言及此。愈覺人之富貴。莫有過焉者矣。人生難得而易失。

佛言誠非謬也客嘿然而止

一可歎

大周曰。天與人兩目。任人觀古觀今。周覽無餘。原不  
教人看色看財。左右牽引。奈何不自愛其目。而一雙  
賽月明眸。滿着色財。屑遂至迷心滅性。永淪黑暗。一  
可歎也。天與人兩足。任人尋水尋山。逍遙自在。原不  
教人走名走利。晝夜奔忙。奈何不自愛其足。而一雙  
凌雲健履。深墜利名坑。遂至失命喪身。長受羈鎖。二  
可歎也。

蠶歎



喫了一餐又一餐睡了一頓又一頓飽食安眠欲已盈尋個結果不踰寸竭髓抽腸巧萬般緊纏密縛無門遁算去算來算自家鑊湯爐炭阿誰恨

息齋四勸

天下肯喫虧的人最占便宜勸你喫些虧好  
天下要便宜的人到底喫虧勸你便宜莫討  
天下最弄巧的人常要犯拙勸你儘巧勿使  
天下極守拙的人每多湊巧勸你養拙而已

戒八無益

不說無益之言。

不行無益之事。

不用無益之心。

不看無益之書。

不交無益之友。

不聽無益之論。

不費無益之錢。

不爭無益之氣。

十無益

不明理讀書無益。

不愛民做官無益。

不積德求子無益。

不安命怨尤無益。

不畏天祀神無益。

不禁殺放生無益。

不戒得布施無益。

不濟人脩仙無益。

不平心念佛無益。

不見性參禪無益。

拈古

洞山解夏上堂云。秋初夏末。衆兄弟東去西去。直須向萬里無寸草處去。石霜云。何不道出門便是草。同安云。直饒不出門。亦是草漫漫地。

息齋云。不管東去西去。但得去便無草。

昔人問僧。魚豈不是以水爲命。曰。是。曰。爲甚麼却向水中死。僧無對。天龍機代云。是伊爲甚麼不向岸上死。

息齋云。只因水裏生。所以向水中死。

鏡清道新年頭佛法有明教道新年頭佛法無石屋  
道道是有也未必有道是無也未必無

息齋云若道有不是新年頭有從來未曾爛却佛法  
若道無不是新年頭無從來未曾添出佛法新年舊  
年總是節外生枝說有說無均之畫蛇添足

道吾問雲巖大悲千手眼那箇是正眼巖曰如人夜  
間背手摸枕

息齋云何不道那箇不是正眼

有人問投子祖祖相傳傳箇甚麼投曰老僧不解妄

語

息齋云傳箇不傳的

周金剛自造金剛經疏鈔自蜀出峽行至澧州路上  
向一婆子買油糍點心婆問大師車上是甚麼文字  
周云金剛經疏鈔婆云經中道過去心不可得現在  
心不可得未來心不可得大德要點那箇心周不能  
答蒙山異禪師說當時若下得一喝大增意氣  
息齋云下一喝也是若某則不然須還問婆子你賣  
點那箇心的油糍

台州六通院僧欲渡船有人問既是六通爲甚麼假  
船無對天台韶代云不欲驚衆

息齋云惟是六通所以船也通得

有人問僧點甚麼燈曰長明燈曰甚麼時點曰去年  
點曰長明何在無對

息齋云汝不見長明燈麼

泗州塔頭侍者及時鎖門有人問既是三界大師爲  
甚麼被弟子鎖侍者無對法眼代云弟子鎖大師鎖  
法燈代云還我鎖匙來又老宿代云吉州鎖虔州鎖

息齋云。你若鎖得虛空。任我也鎖得大師住。

韶國師道通圓峰頂。不是人間心外無法。滿目青山。  
密雲和尚道。通圓峰頂。別是人間。只緣不薦錯認青  
山。

息齋云。通圓峰頂。無異人間。未曾移易絲毫。許年年。  
歲歲。此青山。

偃臺感山主到圓通院相看。第一座問曰。圓通無路。  
山主爭得到來。無對。歸宗柔代云。不期又得相見。  
息齋云。圓通若有路。山主爭得到來。



有僧入冥見地藏菩薩地藏問你平生修何業僧曰  
念法華經曰止止不須說我法妙難思爲是說是不  
說僧無對歸宗代云此回歸去敢請流通  
息齋云忒煞說盡了

聖僧像被漏滴有人問既是聖僧爲甚麼有漏天台  
韶代云無漏不是聖僧  
息齋云聖僧須要漏盡

鷄子趨鷄子飛向佛前欄干上鷄子有人問僧一切衆  
生在佛影中常安常樂鷄子見佛爲甚麼却鷄子無對

法燈代云怕佛

息齋云正是安樂處

僧朝宋太宗問僧甚處來曰廬山卧雲菴曰朕聞卧雲深處不朝天因甚到此無對雪竇代云難逃至化息齋代云卧雲無處不朝天

宋太宗嘗夢神人報曰請陛下發菩提心因早朝宣問左右街菩提心作麼生發無對雪竇代云實謂今古罕聞

息齋代云已發菩提心竟

宋太宗幸開寶塔問卿是甚人曰塔主曰朕之塔因甚卿作主無對雪竇代云闔國咸知

息齋代云誰教陛下不作主

有僧到曹溪守衣鉢僧提起衣曰此是大庾嶺頭提不起底曰爲甚麼在上座手裏無對雲門云彼此不了又云將謂是師子兒

息齋代云大庾嶺頭提不起所以特特來提起

昔高麗國來錢塘刻觀音聖像及舁上船竟不能動因請入明州開元寺供養後有設問無刹不現身聖

像爲甚麼不去高麗國長慶稜代云現身雖普觀相  
生偏法眼別云識得觀音未  
息齋代云正是無刹不現身

有偈曰五蘊山頭一段空同門出入不相逢無量劫  
來賃屋住到頭不識主人公有老宿代云既不識他  
當初問甚麼人賃

息齋代云若識得主人公又何須賃屋住

有僧持鉢到長者家偶爲犬傷長者指袈裟曰龍披  
一縷金翅不吞大師全披法服爲甚却被狗咬

息齋代云。因披法服。所以却被狗咬。

宋太宗幸相國寺。問看經僧曰。是甚麼經。曰。仁王經。曰。既是寡人經。因甚却在卿手裏。無對。雪竇代云。皇天無親。惟德是輔。

息齋代云。若不是仁王經焉得在山。僧手裏。

僧入對次。奏曰。陛下還記麼。曰。甚處相見來。曰。靈山一別。直至如今。曰。以何爲驗。無對。雪竇代云。貧道得得而來。

息齋代云。以如今爲驗。

先淨照禪師問楞嚴大師經中道若能轉物卽同如來若被物轉卽名凡夫祇如昇元閣作麼生轉汾陽代云彼此老大

息齋代云八仙過海各使神通

廣南有僧住菴國主出獵人報菴主大王來請起曰非但大王佛來亦不起王問佛豈不是汝師師曰是王曰見師爲甚麼不起無對法眼代云未足酬恩息齋代云師也是佛

有官人入鎮州天王院覩神像因問院主曰此是何

功德曰護國。天王曰：祇護此國，徧護餘國曰：在秦爲秦，在楚爲楚。曰：臘月二十九日，打破鎮州城。天王向甚麼處去？主無對。

息齋代云：天王在。

有道流在佛前背坐。僧曰：道士莫背佛。道流曰：大德本教中道，佛身充滿于法界，向甚麼處坐得？僧無對。法眼代云：識得汝。

息齋代云：只向不肯處坐。

有施主婦人入院行衆，僧隨年錢。僧云：聖僧前着一。

分婦人曰聖僧年多少無對法眼代云心期滿處卽知

息齋代云隨意着多少

有僧與童子上經了令持經着函內童子曰某甲念底着向那裏法燈代云汝念甚麼經

息齋代云汝不知着處麼咄

或問僧承聞大德講得肇論是否曰不敢曰肇論有物不遷義是否曰是或人遂以茶盞就地撲破曰這箇是遷不遷無對法眼代撫掌三下



息齋代云不遷。

宋太宗朝京寺回祿藏經燬僧乞宣賜召問昔日摩騰不燒如今爲甚却燒無對雪竇代云陛下不忘付囑。

息齋代云如今却也不曾燒。

官人問僧名甚麼曰無棟官人曰忽然將一碗沙與上座又作麼生曰謝官人供養法眼別云此猶是棟底。

息齋進云畢竟以何爲供養始與無棟相應有樹皆。

敷葉無山不吐雲。

石屋禪師曰。寒山曾有言。吾心似秋月。我亦曾有言。吾心勝秋月。秋月非不明。有圓復有缺。安得如我心。圓明常皎潔。有問心如何。教我如何說。

大周曰。我亦曾有言。心月二無別。似則屬比擬。勝豈分優劣。圓時固皎潔。缺亦明不滅。有問心如何。舉頭看秋月。

大淨禪師曰。若道法皆如幻。有造諸過惡。應無咎。云何所作業。不忘而藉佛慈興接誘。

大周答曰。幻福。幻業。俱幻造。福報業報。盡幻報。諸佛  
慈誘。亦幻導。幻難具說。總幻號。要知非幻義。無與巨  
古。及今。恒浩浩。

宋孝宗問天竺僧云。既是飛來峰。何不飛去。答曰。一  
動不如一靜。

大周拈云。得住。且住。何分動靜。

又問觀音手中數珠念甚。答曰。念觀世音菩薩。又問  
自念自號作甚。答曰。求人不如求己。

大周拈云。不是求己。還是勸人。

誌公云人言斑鳩拙。我道斑鳩巧。一根兩根柴。便是營生了。

大周拈云。公道斑鳩巧。我嘆斑鳩拙。營生能幾時。搬柴枉周折。

古德云。如來一切法。除我一切心。我無一切心。何須一切法。

大周拈云。如來一切法。卽我一切心。明我一切心。便了。一切法。